

**FAKTOR PENERIMAAN ISLAM DAN KESAN DAKWAH QARI-QARI MESIR
MELALUI TILAWAH AL-QURAN TERHADAP GOLONGAN NON MUSLIM
FACTORS IN THE ACCEPTANCE OF ISLAM AND THE EFFECT OF
DA'WAH BY EGYPTIAN QARIS THROUGH QURANIC RECITATIONS ON
NON-MUSLIMS**

Wan Hilmi Wan Abdullah¹, Wan Nasyruddin Wan Abdullah², Abu dardaa mohamad³
Mohamad Zulkifli Abdul Ghani^{4*}

1. Guru Bahasa, Pusat Kajian al-Quran dan al-Sunnah, Fakulti Pengajian Islam, UKM, Emel: hjmiey@ukm.edu.my
2. Pensyarah Kanan, Pusat Kajian al-Quran dan al-Sunnah, Fakulti Pengajian Islam, UKM, Emel: tokwedid@ukm.edu.my
3. Pensyarah Kanan, Pusat Kajian Dakwah dan Kepimpinan, Fakulti Pengajian Islam, UKM, Emel: dardaa@ukm.edu.my
4. Pensyarah Kanan, Pusat Kajian Dakwah dan Kepimpinan, Fakulti Pengajian Islam, UKM, Emel: zulghani@ukm.edu.my

* Penulis Penghubung

Artikel diterima: 04 April 2021

| Selepas Pembetulan: 09 Mei 2021

| Diterima untuk terbit: 25 Mei 2021

Abstrak

Al-Quran diturunkan ke atas Nabi SAW adalah bertujuan memberi hidayah kepada semua manusia daripada kegelapan kepada cahaya. Setiap hamba diberi pilihan sama ada mahu beriman kepada Allah SWT atau tidak beriman. Namun begitu, golongan non Muslim juga sepatutnya diberi perhatian untuk mendapat manfaat yang sama daripada pembacaan al-Quran. Qari-qari Mesir memainkan peranan penting dalam penyebaran dakwah melalui majlis pembacaan al-Quran di seluruh dunia seperti India, Pakistan, Britain, Amerika, Perancis, Palestin, Syria, Jordan, Moroko dan lain-lain. Objektif kajian ini akan menjelaskan penglibatan qari-qari Mesir dalam aktiviti pembacaan al-Quran sebagai salah satu tarikan dakwah terhadap golongan non Muslim. Kajian ini juga akan menghuraikan faktor penerimaan agama Islam serta kesannya terhadap golongan non Muslim. Reka bentuk kajian ini adalah kualitatif. Data diperolehi melalui analisis dokumen iaitu jurnal artikel, buku, prosiding dan kertas kerja dan video dokumentari eksperimen sosial dalam *Youtube Channel*. Analisis data dilakukan menggunakan perisian ATLAS TI 8. Hasil kajian ini mendapati Qari al-Quran berperanan dalam menyampaikan dakwah kepada seluruh masyarakat sehingga golongan non Muslim dapat memeluk agama Islam akibat terkesan dengan mendengar bacaan al-Quran yang dibacakan oleh para qari Mesir. Terdapat lima faktor yang mendorong golongan non Muslim menerima Islam ialah mendengar al-Quran berulang kali, keghairahan mendengar alunan suara, keindahan seni al-Quran, bacaan khusus dan tadabur dan keberkatan bacaan al-Quran. Implikasi kajian adalah pengamalan pembacaan al-Quran mendorong golongan non Muslim teruja memeluk agama Islam seterusnya teruja mendalami ajaran yang terkandung di dalamnya. Justeru, lahirlah insan yang bertakwa yang menyambung kembali dakwah al-Quran kepada seluruh masyarakat agar mereka memperoleh hidayah dari Allah SWT.

Kata kunci

Dakwah, tilawah, Qari, Islam, Non Muslim

Abstract

The Qur'an is sent down upon Prophet SAW with the objective to give guidance to all human beings from darkness to light. Each servant is given a choice whether to believe in Allah SWT or not to believe. However, non-Muslims should also be given attention to get the same benefits from the recitation of the Qur'an. Egyptian qaris (Quran reciters) play an important role in the spread of da'wah through Quranic recitation ceremonies around the world such as India, Pakistan, Britain, America, France, Palestine, Syria, Jordan, Morocco and others. This study aims to explain the involvement of Egyptian qaris in the activity of Qur'anic recitation as one of the attractions of da'wah to non-Muslims. This study will also describe the factors of acceptance of Islam and their impact on non-Muslims. The design of this study is qualitative. The data is obtained through document analysis namely through journal articles, books, proceedings, paper works and social experiment videos on Youtube. The data is analysed using ATLAS Ti 8 software. The results of this study show that the qaris of al-Quran play a role in conveying the message of Islam to the whole community so that non-Muslims can embrace Islam as a result of being impressed by listening to the recitation of the Quran recited by the Egyptian reciters. There are five factors that motivate non-Muslims to accept Islam namely listening to the Qur'an repeatedly, the excitement of listening to the melody, the beauty of the art, devout recitation and the blessings of reciting the Qur'an. The implication of the study is that the practice of reciting the Qur'an encourages non-Muslims to embrace Islam and then excited to delve into the teachings contained therein. Thus, pious people are born to continue the da'wah of Qur'an to the entire community so that they obtain guidance from Allah SWT.

Keywords

Da'wah, recitation, reciter, Islam, non-Muslim

1.0 Pengenalan

Keterlibatan para qari di seluruh dunia menggiatkan lagi usaha penyebaran dakwah al-Quran dalam masyarakat terutama kepada golongan non Muslim melalui pendekatan pembacaan al-Quran. Kegigihan Qari al-Quran menyebarkan lantunan suara al-Quran ke seluruh dunia telah membuka ruang yang lebih luas terhadap perkembangan agama Islam. Ramai golongan non Muslim telah memeluk Islam dan menerima agama ini dengan sukarela tanpa paksaan selain tidak bersikap fobia untuk mendekati al-Quran. Ini bertepatan dengan mafhum dari satu hadis yang diriwayatkan tentang tugas dan tanggung jawab seorang qari yang digelar sebagai ahl al-Quran dalam menyeru ummah ke arah menyahut ajaran al-Quran dan hadis. Hadis yang diriwayatkan oleh al-Barra' bin 'Azib yang bermaksud, "bahawa sahabat Nabi SAW iaitu Mus'ab bin 'Umair dan Ibn Umm Maktum telah membacakan al-Quran kepada orang ramai atas perintah baginda SAW"

Hadis ini menjelaskan tentang usaha para sahabat Nabi SAW dalam memberikan ilmu pengetahuan serta kefahaman mengenai al-Quran dan agama Islam kepada golongan non Muslim melalui pendekatan pengajaran dan pembelajaran al-Quran.

Tujuan pembacaan dan mendengar bacaan al-Quran adalah untuk memberi peringatan dan keberkatan serta salah satu cara untuk mendapat hidayah daripada Allah SWT. Firman Allah s.w.t dalam surah al-A'raf ayat 204;

وَإِذَا قُرِئَ الْقُرْآنُ فَاسْتَمِعُوا لَهُ وَأَنْصِتُوا لَعَلَّكُمْ تُرْحَمُونَ ٢٠٤

Maksudnya:

Dan apabila al-Quran itu dibacakan, maka hendaklah kamu dengar serta diam agar kamu peroleh rahmat.

Ayat tersebut menjelaskan bahawa rahmat Allah SWT akan diberikan kepada orang yang mendengar bacaan al-quran dan memberi tumpuan kepada bacaan tersebut serta berdiam diri daripada bercakap atau berbuat sesuatu yang sia-sia ketika seseorang qari al-Quran membacakan ayat-ayat al-Quran.

Ayat ini menuntut kepentingan membaca dan mendengar al-Quran apabila al-Quran diperdengarkan. Oleh itu, sumbangan para qari dalam medium pembacaan tilawah al-Quran ke dalam masyarakat amat penting. Ia bertujuan untuk menyampaikan bacaan al-Quran dan mengajak masyarakat kepada mendekati ajaran al-Quran yang diasaskan oleh Nabi SAW terutama dakwah kepada golongan non Muslim. Kajian ini akan memperkenalkan sumbangan tiga orang qari terkenal di dunia yang banyak menyumbang kepada pembacaan alunan al-Quran ke dalam masyarakat sehingga golongan non Muslim memeluk agama Islam dengan kerelaan hati.

2.0 Perkembangan Penerimaan Islam Golongan Non Muslim melalui Pembacaan al-Quran

Pembacaan al-Quran oleh para qari merupakan metode dakwah atau pendekatan yang sudah lama yang ditunjukkan oleh Rasulullah SAW dan para sahabat semasa di Mekah dan Madinah. Ramai dalam kalangan sahabat memeluk Islam setelah mendengar dan memerhati bacaan al-Quran yang diperdengarkan oleh kumpulan sahabat. Ini menunjukkan pembacaan al-Quran memberi kesan dan keajaiban terhadap penerimaan agama Islam. Al-Zarkashi menyebutkan (2006: 391), antara keajaiban yang diperoleh dalam hati dan telinga para pendengar sama ada mereka mendengar atau sebagai penentang adalah tidak pernah merasai perasaan kemarahan dalam telinga dan lidah tatkala al-Quran itu dibacakan oleh para qari.

Oleh itu, peranan para qari amat penting dalam menggalas tugas menyampaikan dakwah kepada golongan non Muslim. Pada zaman Nabi SAW dan para sahabat, Baginda telah memilih Mus'ab bin 'Umair r.a untuk memikul tanggungjawab tersebut. Beliau dilantik sebagai duta ke bumi Madinah untuk memberi kefahaman kepada golongan Ansar yang sudah beriman serta berbaiah dengan Baginda SAW dalam peristiwa Aqabah demi mengajak mereka kepada agama Islam serta bersiap sedia untuk hari hijrah yang akan tiba. Beliau menyertai rombongan Rasulullah SAW dalam perjanjian Aqabah yang telah menyaksikan hanya 12 orang Islam sahaja yang berbaiah dengan Baginda. Pada musim haji berikutnya dalam perjanjian Aqabah, orang-orang Islam di Madinah telah mengutuskan utusan ke Mekah untuk bertemu dengan Nabi s.a.w. Dalam pertemuan tersebut seramai 70 orang Islam Madinah yang terdiri dari lelaki dan perempuan telah datang ke sana di bawah utusan guru mereka iaitu Mus'ab bin 'Umair.

Kisah pengislaman Sayidina Umar al-Khattab selepas mendengar ayat al-Quran yang dibacakan oleh Fatimah RA pada surah Taha ayat 1 hingga 14 (Ibn al-Zuhri 2001: 248). Demikian juga kisah Asid bin Hudair yang memeluk Islam setelah mendengar ayat-ayat suci yang dibacakan serta tafsiran oleh Mus'ad. Selain beliau termasuk juga kalangan yang memeluk Islam ialah Sa'ad bin Mu'az dan Sa'ad bin 'Ubadah. Selain itu, Jubair bin Mut'im juga memeluk Islam setelah mendengar bacaan al-Quran

yang disampaikan oleh Nabi s.a.w iaitu surah al-Tur sehingga sampai kepada firman Allah (إِنَّ عَذَابَ رَبِّكَ لَوَاقِعٌ) (al-Zarkashi 2006: 391).

Sa'ad bin mu'az r.a yang merupakan seorang musyrik sebelum hijrah setelah mengetahui kedatangan Mus'ab, beliau lantas bertemu dengan Mus'ab. Beliau memeluk agama Islam selepas mendengar bacaan al-Quran yang disampaikan oleh Mus'ab kepadanya ayat dari surah al-Zukhruf, 1-3 (al-Kandahlawi 1999: 1/137). Begitu juga kisah Raja al-Najasyi, seorang raja Habsyah dan ketua pemimpin Nasrani tatkala mendengar bacaan al-Quran daripada Ali bin Abi Talib dari surah Maryam, beliau menangis sehingga membasahi janggutnya, manakala rombongan-rombongan juga ikut menangis bersamanya. Raja al-Najasyi kemudian berkata kepada mereka 'sesungguhnya dia (yakni Muhammad) serta apa yang datang daripada Nabi Isa AS itu adalah mengeluarkan dari pelita yang satu.' (Ibn Hisyam 1990: 362).

Dalam satu kajian oleh Najib Abdullah (2006: 76-77) menjelaskan tentang keajaiban pembacaan al-Quran ke atas non Muslim sehingga mereka dapat memeluk Islam. Salah satu surat rasmi yang dihantar oleh Harun Sellars kepada Imam Masjid Haramain Shaykh Khalid al-Qahtani bahawa dua orang ahli muzik Amerika iaitu seorang pencipta muzik dan seorang lagi pemain gitar telah memeluk Islam setelah mendengar bacaan al-Quran dari beliau.

Pemelukan orang bukan Islam ke dalam agama Islam hanya kerana mendengar bacaan walaupun belum memahami kandungan ayat tersebut. Allah SWT telah menyebut bahawa al-Quran merupakan sumber hidayah kepada semua manusia. Ini kerana salah satu cara meninggalkan al-Quran ialah meninggalkan mendengar bacaan al-Quran sebagaimana yang dinyatakan oleh Imam Ibn al-Qayyim. Dengan ini menunjukkan dengan hanya mendengar bacaan al-Quran sebagai sumber rahmat dan hidayah Allah SWT. Menurut Abdul Sami' (2008) golongan musyrikin Mekah cuba sedaya upaya menjauhkan pendengaran ayat al-Quran kepada masyarakat ketika itu dengan mengeluarkan tuduhan al-Quran merupakan sihir, ciptaan Nabi Muhammad SAW dan tuduhan yang lain. Ini kerana jika mereka mendengar bacaan al-Quran boleh mengubah mereka daripada kegelapan kepada cahaya.

3.0 Penglibatan Qari al-Quran dalam Pembacaan al-Quran

Penglibatan para qari Mesir seperti Shaykh Mustafa Isma'il, Shaykh Abdul Basit, Shaykh Muhammad Rif'at, Shaykh Mahmud Khalil al-Husari, Shaykh Dr. Ahmad Nu'ina', Shaykh Mahmud Ali al-Banna, Shaykh Sadiq al-Minshawi yang merantau dan mengelilingi dunia seperti negara Somalia, Algeria, Britain, Amerika Syarikat, Perancis, Afrika, Jordan, Syria, Palestin, Lubnan, India, Pakistan, Bangladesh, Thailand, Indonesia, Malaysia dan lain-lain negara adalah bertujuan menyampaikan risalah al-Quran melalui platform pembacaan al-Quran sehingga golongan non Muslim menerima agama Islam dengan sukarela.

3.1 Shaykh Mustafa Isma'il

Shaykh Mustafa Isma'il telah menghabiskan banyak tenaga dan masa untuk menyebarkan al-Quran ke pelosok dunia. Aktiviti harian beliau adalah membaca dan memperdengarkan al-Quran kepada masyarakat. Beliau sering mendapat jemputan sama ada dari dalam negeri mahupun luar negeri seperti Amerika, Perancis, Britain, Lubnan, Syria, Malaysia, Indonesia dan lain-lain negara bagi menghidupkan program-program keagamaan Islam seperti maulid, nuzul, awal Muharam dan lain-lain. Shaykh

Mustafa Isma'il telah berkhidmat dalam bidang tilawah al-Quran melebihi tempoh 30 tahun sejak dari usia 16 tahun sehinggalah menghembuskan nafas akhir pada tahun 1978. Beliau telah meninggalkan rekod turath rakaman bacaan al-Quran sebanyak 52624 jam (Kamal Najmi 1992).

Beliau dilantik secara rasmi sebagai *qari al-Surah* di Masjid al-Azhar dan bacaan al-Quran dijalankan pada setiap hari Jumaat. Ketika berada di kemuncak kemasyhuran, Shaykh Mustafa Isma'il telah memeterai perjanjian dengan siaran televisyen Mesir dan beliau dipilih sebagai qari pertama yang merakamkan bacaan al-Quran secara murattal. Perjanjian bersama siaran televisyen tersebut telah diadakan pada tahun 1944 (Ahmad al-Buluk 2011: 61). Menurut Kamal Najmi (1992: 174-175), sumbangan terbesar Shaykh Mustafa Isma'il kepada masyarakat adalah himpunan turath bacaan al-Quran dalam bentuk Mushaf Mujawwad li al-Syeikh Mustafa Isma'il sebanyak 30 juzuk, Mushaf Murattal li al-Syeikh Mustafa Isma'il sebanyak 30 juzuk, rakaman audio studio (al-Tasjilat al-Dakhiliyyah) dan rakaman audio luar (al-Tasjilat al-Kharijiyyah) dengan pelbagai surah dan ayat dalam bentuk cakera padat ataupun kaset.

3.2 Muhammad Rif'at

Penglibatan Shaykh Muhammad Rif'at sebagai qari sama ada di peringkat negeri mahupun luar negara juga memberi impak sangat besar terhadap penyebaran Islam. Beliau telah dipilih secara rasmi sebagai qari al-surah di masjid Fadil Basha bermula dari tahun 1918 hingga 1942. Pemilihan itu adalah sangat tepat kerana ditangannya telah ramai orang non Muslim memeluk agama Islam (Mahmud al-Sa'dani 1996). Kehebatan dan kekuatan suara Muhammad Rif'at telah menarik minat pemerintah Britain untuk menghantar pesawat khas bagi membawanya ke London tujuan membuat persembahan bacaan al-Quran (Mahmud Tawfiq al-Khawli 2011)

Beliau juga dipelawa memperdengarkan alunan bacaan al-Quran yang disiarkan secara langsung dalam satu majlis perasmian siaran Idha'at al-Misriyyah pada tahun 1934 sebagai qari pertama yang diberikan penghormatan (Mahmud Tawfiq 2011). Bacaan al-Quran buat kali pertama oleh Shaykh Muhammad Rif'at yang telah direkod ialah pada hari kemangkatan Raja Fu'ad tahun 1936 dan beliau membacakan surah Hud. Manakala rakaman kali kedua pula adalah ketika al-Nuhas Basha menunaikan solat Jumaat di masjid Fadil Basha pada tahun 1938 dengan surah al-Kahf. Kedua-dua rakaman itu direkod secara langsung di hadapan para ahli jemaah solat (Faruq Fahmi 1994).

Sumbangan beliau terbesar adalah terdapat himpunan turath rakaman bacaan yang masih tersimpan rapi iaitu mengandungi 278 keping cd yang memuatkan sebanyak 19 surah dalam tempoh durasi selama 21 jam. Rakaman tersebut menjadi sumber utama bagi tujuan pengajaran dan pembelajaran kepada masyarakat dunia. Atas dasar tersebut, beliau digelar sebagai Amir al-Qurra' (Faruq Fahmi 1994).

3.3 Abd al-Basit Abd al-Samad

Penglibatan beliau dalam bidang pembacaan dan dakwah al-Quran juga besar impaknya terhadap masyarakat non Muslim. Beliau telah bermusafir ke luar negara lebih daripada 100 kali dan telah berjaya mengislamkan seramai 92 masyarakat di negara Uganda serta 30 orang di Amerika ketika lawatan kali pertama pada tahun 70-an. Antara kalangan para pembesar atau raja yang berminat dengan bacaan Shaykh

'Abd al-Basit adalah raja Muhammad iaitu raja kelima bagi negara Maghribi. Seorang wakil Amerika terkenal, Marlon Brando pernah menganggap Shaykh Abd al-Basit adalah sebagai ikon utama bagi masyarakat di sana. Manakala wartawan Perancis menggelar beliau dengan 'suara legenda' selepas selesai beliau mempersembahkan al-Quran selama dua malam berturut-turut di sebuah panggung terkemuka di Paris (Zakaria Hamimi 2009).

Menurut Shukri al-Qadi (1997), Shaykh 'Abd al-Basit dianugerahkan dengan pelbagai pingat kerana jasa dan sumbangan beliau sepanjang penglibatan dalam tilawah al-Quran, antaranya ialah Pingat Kebesaran Maghribi (Wisam al-Kafa'ah al-Fikriyyah), Pingat Darjah Kebesaran Senegal (Wisam al-Istihqaq), Dua Pingat dari Perdana Menteri Suria, Sabri al-'Asali tahun 1959, Pingat Emas, Malaysia (Wisam al-Dhahbi), Pingat Darjah Kebesaran Indonesia (Wisam al-Istihqaq), Pingat dari Idha'at al-Misriyyah pada hari ulang tahun ke 50 pada 1984 (Wisam al-Idha'at al-Misriyyah), Pingat Emas, Pakistan tahun 1985 (Wisam al-Dhahbi), Pingat dari Tunisia, Lubnan dan Iraq, Pingat Darjah Kebesaran Peringkat Pertama dari Presiden Mubarak, Mesir di hari al-Du'a' pada tahun 1987 (Wisam al-Istihqaq), Pingat Pengetahuan dan Kesenian Peringkat Pertama dalam Ihtifal Lailah al-Qadr pada tahun 1990 (Wisam al-'Ulum wa al-Funun).

4.0 Faktor Penerimaan Islam daripada Bacaan al-Quran oleh Qari Mesir

Penyertaan Shaykh Muhammad Rif'at semenjak dari tahun 1940 telah mengajak golongan non Muslim kepada memeluk Islam. Undangan dari negara-negara luar seperti Amerika, Perancis dan Britain untuk menghidupkan acara-acara rasmi kerajaan telah membuka peluang seluas-luas kepada beliau menyampaikan risalah dakwah kepada tentera Amerika. Menurut Taufik al-Khauili (2011: 83) Diceritakan bahawa seorang askar Amerika telah menemui ketua penyiaran berbangsa Inggeris untuk menuntut darinya satu permintaan pelik dengan berkata;

"Wahai pengetua, aku mahu melihat Shaykh Muhammad Rif'at! adakah yang kamu maksudkan itu seorang qari, soal pengetua! Jawab askar, 'Ya, sesungguhnya pernah suatu hari aku mendengar suaranya secara kebetulan, kemudian aku mengikutinya sehinggalah suaranya menjadi rutin harian sepanjang hidupku. Semenjak itu, aku sentiasa membaca segala buku-buku yang ditulis oleh orientalis yang berkaitan dengan Islam.' Askar tersebut memeluk Islam dan teringin menemui Shaykh Muhammad Rif'at untuk mendapatkan keberkatan daripada pengislaman beliau serta memilih nama yang sesuai bagi dirinya.

Para Qari Mesir sering di undang ke negara luar untuk memperdengarkan bacaan al-Quran. Peluang dan kepercayaan yang telah diberikan oleh negara luar dimanfaatkan sepenuhnya oleh para qari Mesir dengan melantunkan bacaan sesuai dengan sasaran. Para qari Mesir mengambil peluang semasa membacakan al-Quran dengan penuh perhatian dan menggunakannya sebagai salah satu cara penyebaran dengan memilih ciri-ciri tertentu semasa melantunkannya. Oleh yang demikian ia menarik minat orang Islam dan juga orang bukan Islam untuk mendengar bacaan sekali gus memberikan manfaat yang besar kepada jiwa mereka. Terdapat pelbagai faktor yang menyebabkan mereka terkesan dengan bacaan para qari Mesir. Antara faktor tersebut sebagaimana berikut:

4.1 Mendengar al-Quran berulang kali

Bacaan qari mesir mempunyai keistimewaan tersendiri sehingga tidak jemu untuk mendengarnya secara berulang kali. Semakin diulang dengar semakin menarik minat. Bacaan qari mesir selalu diperdengarkan samada di Masjid, di kedai, di tempat awam dan tempat yang lain. Menurut Mahmud Tawfiq al-Khawli (2011: 84) berlaku kepada seorang warga negara Britain yang berkhidmat sebagai pemandu keretapi transit di Mesir, beliau memeluk Islam selepas mendengar berulang kali bacaan al-Quran yang disampaikan oleh Shaykh Muhammad Rif'at di kawasan perhentian keretapi di perkampungan Hayy Darb al-Jamamiz, masjid Fadil Basha. Maka seluruh keluarganya yang berada di London juga turut mengisytiharkan keislaman mereka dan mereka datang ke Kaherah.

4.2 Keghairahan mendengar alunan suara

Bacaan qari Mesir dengan suara yang lunak menusuk kalbu para pendengar. Teknik bacaan yang diperdengarkan boleh menarik minat dan amat sesuai untuk semua lapisan masyarakat. Nada bacaan qari Mesir membawa keghairahan para pendengar untuk mendengarnya bagi tujuan yang pelbagai antaranya menenangkan jiwa, mengisi masa lapang, mendapat ganjaran dan sebagainya. Menurut Ahmad al-Buluk (2011: 22) Tilawah Shaykh Muhammad Rif'at bukan sahaja terkenal dalam negeri, malah sampai ke sempadan luar negeri yang menyaksikan masyarakat di wilayah London, Paris dan Berlin sangat ghairah untuk mendengar suaranya yang sering berkumandang di siaran radio di sana semasa peperangan dunia meletus.

Perkara yang sama juga berlaku kepada qari seterusnya ialah Muhammad Sofwat Husin Muhammad Rif'at yang merupakan seorang anak kepada Shaykh Rif'at. Sofwat Husin telah memainkan sumbangan dalam penyebaran dakwah melalui pembacaan al-Quran yang menusuk kalbu sehingga menarik minat bukan Islam untuk mendalami lebih lagi terhadap agama Islam. Menurut Tawfiq al-Khawli (2011: 84) bahawa Sofwat Hussin telah menceritakan;

"Aku mendengar dari salah seorang kawanku yang berkhidmat sebagai guru bahawa rakan kepada bapanya adalah seorang kristian dan beliau memeluk Islam setelah mendengar suara Shaykh Muhammad Rif'at" (Mahmud Tawfiq al-Khawli 2011: 84).

4.3 Keindahan seni al-Quran

Para qari Mesir amat tinggi kemahiran dalam mengungkapkan ayat al-Quran dengan penuh kefasihan pada sebutan huruf sehingga menampakkan keindahan yang ada pada al-Quran. Ciri-ciri bacaan yang dimiliki oleh qari Mesir sangat menarik umat Islam dan tidak ketinggalan juga orang bukan Islam. Hanya sekadar mendengar walaupun tidak memahami boleh menarik minat disebabkan keindahan bacaan yang di persembahkan. Keindahan bacaan al-Quran lebih terserlah dengan mukjizat al-Quran yang boleh melembutkan para pendengar dan menusuk kalbu. Kefasihan keindahan seni bacaan al-Quran antara yang terbaik dan terhadapan dalam dunia bacaan al-Quran.

Atiyah dan Nahid (1984) menyebutkan, tatkala Shaykh Muhammad Rif'at membaca al-Quran, beliau seolah-olah berada di dalam naungan Allah SWT kerana keindahan suara dan keajaiban persembahan serta kemahiran beliau dalam mengungkap ayat-ayat dan fasih dalam sebutan huruf, justeru ramai yang memeluk Islam, mempelajari al-Quran dan belajar ajaran yang terkandung dalam syariat agama Islam.

4.4 Bacaan Khusyuk dan Tadabur

Bacaan ayat al-Quran perlu dihayati dan difahami. Bacaan yang diiringi penghayatan dan pemahaman boleh menghadirkan kekhusyukan. Kekhusyukan hadir daripada proses *tadabur* terhadap ayat yang dibaca. Pembacaan yang disertai dengan *tadabbur* membawa kepada kekhusyukan. Bacaan yang penuh kekhusyukan hadir daripada hati yang bersih dan suci. Bacaan yang hadir daripada hati yang bersih dan suci mudah menembusi hati-hati manusia samada hati yang bersih atau kotor. Hati yang kotor pun boleh mendapat manfaat daripada bacaan yang hadir dari hati yang bersih.

Bacaan yang diperdengarkan oleh qari mesir datang dari hati yang bersih. Oleh itu bacaan yang diperdengarkan dilaungkan dengan penuh khusyuk dan tadabbur. Hal ini ditegaskan lagi dengan nukilan dari Ahmad Sha'ban dalam sebuah majalah al-Ahram yang menjelaskan bahawa orang-orang Islam dan bukan Islam sentiasa menanti persembahan bacaan al-Quran yang disampaikan oleh Shaykh Muhammad Rif'at dalam siaran-siaran televisyen tempatan dan antarabangsa. Faktor bacaan khusyuk dan tadabur adalah penyebab utama minat dan tarikan golongan non Muslim kepada pengislaman. Salah satu contoh sebuah keluarga besar dari Inggeris datang dari negara Kanada menuju ke Mesir untuk bertemu dengan pemilik suara emas ini yang digelar sebagai '*mu'jizah al-Qarn al-'Ishrin*.' (Mahmud Tawfiq al-Khawli 2011).

4.5 Keberkatan bacaan al-Quran

Penglibatan Shaykh Mustafa Isma'il pula dalam dakwah melalui pembacaan al-Quran memberi kesan yang amat besar terhadap golongan non Muslim. Bacaan beliau telah berjaya menarik ribuan manusia kepada menerima agama Islam secara sukarela. Perkara ini berlaku oleh kerana keberkatan bacaan al-Quran dan juga cara persembahan dalam mengalunkan bacaan sesuai dengan sasaran sehingga boleh menggoncangkan kalbu.

Menurut Atiah Abdul Khaliq Khalil (1984: 173) Shaykh Mustafa Isma'il telah terlibat dalam dunia tilawah semenjak dari tahun 1942 yang ditugaskan sebagai qari di perkampungan Hayy al-Mugharbilin di Kaherah di mana Persatuan Qurra' pernah mempelawa beliau untuk memperdengarkan bacaan dalam satu majlis Maulid Nabi SAW yang turut ditonton bersama oleh Pemerhati Khas Diraja. Setelah itu, pihak Istana berminat untuk mengundang Shaykh Mustafa Isma'il ke Istana Raja (Faruq) bagi menghidupkan majlis malam Lailatul Qadar pada sekitar tahun 1945. Rentetan peristiwa itu, nama beliau mula dikenali serta meningkat naik sehingga menjadi qari pertama dalam negeri yang menyamai populariti dengan qari-qari di luar negeri. Beliau telah berjaya mengislamkan ramai golongan non Muslim hasil daripada pendekatan bacaan al-Quran.

Qari yang seterusnya banyak memainkan peranan dalam kegiatan dakwah kepada golongan non Muslim ialah Shaykh 'Abd Basit juga telah memberi impak sangat besar terhadap pengislaman mereka. Menurut Zakaria Hamimi (1996: 132) Pada tahun 1985, Shaykh 'Abd Basit bersama Shaykh al-Azhar dan Shaykh Jad al-Haq telah menziarahi negara Maldives bagi menghadiri majlis Ihtifal Presiden Makmun Abdul Qayyum dalam usaha mengembangkan lagi dakwah ke seluruh pelusok dunia.

Syeikh Shaykh 'Abd al-Basit sebagai perangsang dalam mendorong non Muslim terutama di negara Afrika untuk meminati dan seterusnya mendalami ilmu al-Quran. Menurut Nabil Hanafi (2011) hal yang membanggakan rakyat Afrika terhadap Shaykh

'Abd Basit adalah dorongan dan semangat mereka untuk menghantar anak-anak ke bumi Mesir bagi menghafaz al-Quran dan mempelajari hukum tajwid. Manakala menurut Zakaria Hamimi (1996: 135) menyatakan bahawa perjalanan Shaykh 'Abd al-Basit ke negara Afrika selatan pada akhir tahun 1966 telah membuka jalan pintas dan mudah kepada penerimaan agama Islam. Seramai 99 orang dari golongan non Muslim Afrika mengisytiharkan masuk Islam.

Seterusnya Syeikh Abdul Basit melebarkan penyebaran kepada negara-negara yang berjiran dalam usaha menanam minat terhadap al-quran dan membawa kepada cinta kepada Agama Islam. Menurut Zakaria Hamimi (1996: 141) dalam lawatan Shaykh 'Abd al-Basit ke Oganda pada tahun 1977 atas undangan Presiden 'Aidi Amin dalam majlis Ihtifal Maulid Nabi, seramai 12 orang individu memeluk agama Islam. Mereka telah melafazkan syahadah di tangan Shaykh 'Abd Basit sendiri di hadapan para hadirin yang mengikuti pertemuan tersebut. Salah seorang mereka adalah seorang wanita yang diberi nama 'Aminah' oleh Shaykh 'Abd Basit berikutan mengambil sempena dengan nama ibu baginda Nabi SAW.

Penyebaran dakwah melalui pembacaan al-Quran tidak terhenti di negara Afrika sahaja, bahkan ia diperluaskan lagi kepada negara-negara lain. Menurut Zakaria Hamimi (1996: 146) Perjalanan Shaykh 'Abd al-Basit ke Amerika pada tahun 1971 telah merekodkan seramai 30 orang memeluk Islam pada pertama kali lawatan beliau ke sana. Hakikat sebenar bagi golongan non Muslim yang memeluk agama Islam ini semuanya dalam pengetahuan Allah SWT. Dalam satu laporan yang dikeluarkan oleh akhbar Mesir pada 4 Julai 1971 melaporkan bahawa '30 warganegara Amerika telah memeluk Islam di tangan Shaykh Abd Basit Abd samad.

5.0 Kesan Bacaan al-Quran terhadap Golongan Non Muslim

Penglibatan qari Mesir dalam dakwah al-Quran kepada golongan non Muslim di seluruh dunia telah memberi kesan yang amat mendalam terhadap tahap keyakinan mereka untuk beriman dan menerima Islam sebagai agama universal. Kesan tersebut dapat dilihat dalam dua aspek iaitu kesan secara khas dan am.

5.1 Menggerakkan hati dan ketenangan jiwa

Para Qari Mesir telah memainkan peranan dalam penyebaran agama melalui tilawah al-Quran yang boleh menggerakkan hati serta boleh membawa ketenangan apabila mendengar lantunan suara bacaan al-Quran. Pada masa kini terdapat dalam media massa yang menunjukkan bagaimana reaksi orang bukan Islam apabila mendengar bacaan a-Quran seolah mereka memahaminya kerana keadaan mereka yang tenang dan boleh menggoncangkan hati mereka hasil daripada bacaan yang tepat menusuk kalbu.

5.2 Milik Allah, keyakinan kuat dan kehidupan bermakna

Pembacaan al-Quran yang baik diperdengarkan kepada non Muslim boleh membawa kepada kepercayaan kepada agama Islam. Ini bertepatan dengan keindahan al-Quran yang diturunkan oleh Allah SWT. Terdapat pelbagai kisah yang menunjukkan kepada penerimaan Islam hasil mendengar keindahan bacaan al-Quran sebagaimana yang berlaku kepada Saidina Umar r.a.

Dalam dokumentari yang dihoskan oleh Sheikh Fahad AlKandary yang disiarkan dalam *Youtube Channel* pada 6 Januari 2016 tentang eksperimen terhadap non Muslim,

setelah diperdengarkan bacaan al-Quran kepada peserta kajian maklum balas mereka seperti berikut;

Peserta kajian adalah seorang wanita Amerika telah memberikan respons, "Apabila aku mendengar bacaan ayat-ayat suci al-Quran, aku merasakan bahawa aku adalah milik Allah. Aku juga merasakan tahap keyakinan mereka menjadi kuat, tapi tanpa pergantungan kepada Allah ianya adalah sia-sia. Demikian juga jika tanpa Islam, kehidupan aku tidak ada makna." Peserta kajian tersebut telah memeluk Islam setelah mendengar alunan bacaan al-Quran.

5.3 Perasaan tenang, gementar dan keinginan untuk berehat

Al-Quran merupakan sumber ketenangan sebagaimana yang ditegaskan al-Quran dalam surah al-Ra'du (28) dan al-Anfal (2). Sesiapa yang mendengarnya boleh tertawa dan akan merasai kesannya terutama dalam diri setiap individu. Perkara ini tidak dapat dinafikan kecuali mereka yang benci terhadap agama Islam.

Eksperimen yang disiarkan pada 10 Februari 2016 dalam Youtube tentang kesan bacaan al-Quran ke atas non Muslim, peserta kajian telah memberikan respons selepas mendengar bacaan al-Quran yang dibacakan oleh syeikh Misnyari al-Afasi. Butirannya adalah seperti berikut;

"Jiwa menjadi tenang, kedua jari jemari menjadi gementar, terasa sesuatu yang baik yang tidak dapat digambarkan, datang keinginan untuk berehat dan tidur."

Peserta kajian berikutnya diperdengarkan bacaan Syeikh Sudais, mereka memberikan respons seperti berikut,

"Perasaan baik dan rasa sejahtera, rasa rehat dan tenang."

6.0 Kesimpulan

Kajian ini menjelaskan tentang penglibatan *qari al-Quran* Mesir seperti Shaykh Muhammad Rif'at, Shaykh Mustafa Isma'il, Shaykh 'Abd al-Basit, Shaykh Mahmud Khalil al-Husari, Shaykh 'Ali al-Banna, Shaykh al-Siffi, Shaykh Kamil Yusuf al-Bahtimi, Shaykh Shahat Anwar dan selainnya dalam majlis dan program pembacaan dan persembahan alunan bacaan al-Quran di seluruh dunia. Penyertaan ini telah memberikan kesan dan impak besar dan positif terhadap golongan non Muslim untuk memeluk Islam secara baik dan sukarela tanpa sebarang desakan dan paksaan daripada mana-mana pihak. Dalam kajian ini menyatakan bahawa terdapat 144 non Muslim yang telah memeluk Islam setelah mendengar bacaan al-Quran yang disampaikan oleh para qari tersebut. Faktor yang mendorong golongan non Muslim menerima Islam ialah mendengar al-Quran berulang kali, kehairahan mendengar alunan suara, keindahan seni al-Quran, bacaan khusyuk dan tadabur dan keberkatan bacaan al-Quran. Manakala kesan yang membawa kepada pengislaman mereka ialah menggerakkan hati dan ketenangan jiwa, milik Allah, keyakinan kuat dan kehidupan bermakna dan perasaan tenang, gementar dan keinginan untuk berehat.

Rujukan

Abdul Sami' Khamis al-Arabid. (2008). Hajr al-Quran al-Karim; Mazhahiru wa 'Ilajuhu, Dirasat Quraniyyah. Felastin: Mukhtar 'Alami al-Dauli; Al-Quran al-Karim wa Dauruhu fi Mu'alajah Qadaya al-Ummah.

Ahmad al-Buluk. (2011). Ashhar Man Qara' al-Qur'an fi al-'Asr al-Hadis. Silsilah Thaqafah Shahriyyah Iqra'. Al-Qahirah: Dar al-Ma'arif.

al-Bukhari. (2001). al-Jamic al-Sahih. Cet. Pertama. Bayrut: Dar al-Thawq al-Najah. Al-Quran.

- Al-Zarkashi, Muhammad bin Abdullah al-Zarkashi Bard al-Din. (2006). *al-Burhan fi 'Ulum al-Quran*. tahqiq Abu al-Fadl al-Dumyati. al-Qahirah: Dar al-Hadis.
- Atiyyah 'Abd al-Khaliq & Nahid Ahmad Hafiz. (1984). *Fann Tarbiyyah al-Sawt wa 'Ilm al-Tajwid*. Kaherah: Maktabah al-Anjalu al-Misriyyah.
- Faruq Fahmi. (1994). *Al-Qur'an wa Mashahir al-Qurra'*. al-Qahirah: Kitab Jumhuriyyah Misriyyah.
- Ibn Hisham. (1990). *Sirah al-Nabawiyyah li Ibn Hisham*. Tahqiq 'Umar 'Abd al-Salam Tadmuri. Cet. 3. Bayrut: Dar al-Kitab al-'Arabi.
- Kamal al-Najmi. (1992). *Al-Shaykh Mustafa Isma'il Hayatuh fi Zillil al-Qur'an*. Al-Qahirah: Muassasah Dar al-Hilal.
- Mahmud al-Khawli. (1992). *Aswat min Nur*. Al-Qahirah: Dar al-Shabab.
- Mahmud al-Sa'dani. (1996). *Alhan al-Sama'*. Al-Qahirah: Akhbar al-Yawm.
- Mahmud Tawfiq al-Khawli. (2011). *Qitharah al-Sama' al-Shaykh Muhammad Rif'at*. Cet. Pertama. Al-Qahirah: al-Maktabah al-Azhariyyah.
- Muhammad bin Sa'd bin Muni' al-Zuhri. (2001). *Kitab al-Tabaqah al-Kabir*. Tahqiq Ali Muhammad 'Umar. Al-Qahirah: Sharikah al-Dawliyyah li al-Tiba'ah.
- Muhammad Yusuf al-Kandahlawi. (1999). *Hayat al-Sahabah*. Tahqiq Bashir 'Awad Ma'ruf. Muassasah al-Risalah.
- Nabil Hanafi. (2011). *Nujum al-'Asr al-Dhahbi li al-Dawlah al-Tilawah*. Kitab al-Yaum. Kaherah: Dar al-Akhbar al-Yawm.
- Najib Abdullah. (2006). *'Aja'ib Qira'ah al-Quran 'Ala al-'Urubiyyin wa al-Amirikan*. Kuwait: Huquq al-Taba' wa al-Tawzi', Maharat li al-Ishtiharat wa al-Tadrib.
- Shukri al-Qadi. (1997). *'Abaqirah al-Tilawah fi Qarn al-'Ishrin*. Kaherah: Dar al-Jumhuriyyah.
- Zakariya Hamimi. (2009). *Sawt Min al-Sama'*, al-Shaykh 'Abdal-Basit 'Abd Samad. Cet. Pertama. Al-Qahirah: Hibah al-Nil al-'Arabiyyah.
- https://www.youtube.com/watch?v=LmvqJBtArI8&ab_channel=Denaihati, https://www.youtube.com/watch?v=7YYuq7KZx3k&ab_channel=AbdurrahmanAl-AmiryOfficial
- https://www.youtube.com/watch?v=4fPF5C9EW8&ab_channel=KoranopiniOpini.
- https://www.youtube.com/watch?v=fkYsTqp_uM
- https://www.youtube.com/watch?v=HV7-_sz_Ez0